

"To dibi la, i te fen ye, fen yere t'i ye. Nka bo dibi la, i be fen ye wa fen yere b'i ye" AMPJ nemaaba Mariamu Tarawele

DIBIFARA

Boko 3

Boko kelen kalo kono

Sigida : Bajalan 1^o, bolen 469, du n'moro 302. @ : dibifaramali@webmails.com Bamako-Mali
San 2001 nowanburukalo

Dantige Tijé ka kunan

An donna mara cogoya yeləmabolo kura la an ka jamana kono. Dōw ko mara cemeboli. Dōw fana ko desantaralizason. Nin bee ye fen kelen ye, nin bee be fen kelen de nini : jamakulu k'a yere kunkow penabo a yere ye. Nka, sariya kono de. O sariya bolofara dōw de ye marayoro cemabolenw sigili yamaruya, ka kominko yamaruya. Nan ye kominiw mafile, an b'a ye k'a fo geleyaw ka ca. A la belebele dō ye komini ka yiriwali nafoloko ve. O nafolo kufole ba b'a Goferenaman yoro ka jesin kominiw ma. A san saba ye ninan ye o nafolobo be tiime jamana kunnasigiw fe. Kominkonomogow yere ka niyoro bota dun ? O de ye sekilisabasiri ye sisani. Tijé ka kunan, nka an k'a fo geleya bee ye kominkonomogow de ye. Lenposarabaliya ni takisisarabaliya y'o seere ye kominiw kono. Faamubaliya waa ban de ? Ne b'a da faamubaliya kun. An k'a don 'o Goferenaman be nafoloko deme min lace kominiw ma u ka yiriwali kama, o be jate bolomademe de ye. O be da kominiw yere ka nafolo bolenw kan. Kominiw dun ka o nafollow te bo sanfe ka cun. O kumate. A be bo kominkonomogow bee lajelen de kun lenpo ni takisi n'u noggonnaw sarali siratige la. O walew keli b'an ka komindennumanya sementiya. An k'a don ko "nunu te san sorò juru k'o". Kominiw ka yiriwali siratige la, u jigi folo ye kominkonomogow de ye. O tuma, an k'an jija k'an ka lenpo ni takisi dantigelenw sara kominiw kono. Bamananw ko "N deme n ka doni na, o kasoro a nunen be i yere disiyanfan de". Bee dun b'a don ko "Banyereye te jesuma abada". Ala k'an son hakili juman na.

Yusufu JALO

Fakannakalanko : Netaa ka sabati

(pe 6)



CNR-ENF ka ja

Mara Jébô Kojuman

Bila Komini kibaruyaw

(pe 3)

Denmisenga Yiriwali

APAF-Muso Danbe : Baarakedenw Lakanada

(pe 9 ni 11)

Boko nata bëna boli Bananba Komini kibaruyaw kan

Dine Kibaruyaw

Kunnafonilaselaw taara “PPS/FEM” ka kalanso la

Kunnafonilasela maa 22 (kumakelaw ni səbennikelaw) ye nōgōn sōrō Namana (Kulukōrō mara la) nin nowanburukalo tile 5 ka taa a bila a tile 8 na. U taakun tun ye kalan ye, min kera sababu ye k'u bēe lajelen dege “PPS/FEM” ka baara bolodalenw kōnōkow la. Tile 5 in ye tali ke kalansen 3 kan, minnu walawalala an karamogo 3 fē n'olu ye Jigiba Tarawele, Samiyeli Jara ani Abudulayi Bagayogo ye.

Kalansen fōlō ye tali ke waati cogoya kan (nēnē ni funteni nasira la). Filanan bolila an ka jamana ni jamana wērew jibolisiraw lakanacogo kan. Sabanan ye tali ke nimafen lakanacogo kan (sogow ni jiriw fo ka taa se fēn nēnamaw ma) An karamogo Abudulayi Bagayogo y'a jira a ka nēfoli senfē, ko hadamaden ka baaraw bē yēlēmaba don waati cogoya la i n'a fōtobilisisiw, jiritigē, tasumadonkungola ani fēn

caman wērew.

Tile filanan baara bolila jamanaw ni nōgōn ce jibolisiraw lakanani sariyaw kan.

Karamogo Samiyeli Jara y'a da don an ka jamana ni jamana wērew ce jibolisirako la k'o walawala kōsēbē. O ye tali ke Nizeri ba, Sēnegali ba ani dugujukōrōjiw kan.

An karamogo Jigiba Tarawele labanna, k'a jira ko dīne nimafen dan te hadamaden dōron ye. Jiriw, sogow ani fēnjēnamaninw fana ye nimafen dōw ye. O kama, olu ni lakanani ka kan k'a d'a kan, n'olu te yen, hadamaden ka baloko bē gēleya kōsēbē.

Kalanw kuncelen, kunnafonilaselaw ye sēbenw laben minnu bē boli u ka baara kēcogo kan jama lafaamuyali siratige la nin fēn kofolenw lakanani kan. “SECO-ONG” ni “Coopérative Jamana” de jera ka kalan in laben. A kera ni “PPS/FEM” ka dēmē ye.

Bubakari KANTE

Arasini Sali ye jōnjōn sōrō

An ka bōko temenen na, an ka kōrōfō dō latemena an Karamogo Arasini Sali ka kewalew kan silamediinē sabatili la ani hadamadenw kalali nōgōn na. Aw k'a dōn ko ɔkutōburukalo temenen tile 12 don, Kurang Kanubagaw ka Ton n'o ye AS.A.S.CO ye, o ye waalan di Arasini Sali ma. Jōnjōn ni medayi tun bē waalan in na.



Medayi datō Arasini disida la

DIBIFARA kurubonkarila DIBIFARA. dagayoro la nin ɔkutōburukalo temenen tile 15, aw ka kunnafonilasesēben kurubonkarila. Nin don nēnē pēmaaya kalifara CCA-ONG, Bamako komini 3nan pēmaaba ni Bajalan kin dugutigi la. Yusufu Sangare n'ale tun ye nin don kumatigi ye, ale ka bisimilali kōfē. Konéla Mariyamu Tarawele, n'ale tun ye CCA-ONG ka nōnabilā ye, ale ye kuma ta. A y'a ka nisondiya jira kātila, k'a da jama tulo kan ko DIBIFARA nana a nawaati la bawo kunnafonikodēsē bē jamanadenw na sango minnu te tibabukan sēbennēn don n'u bē togodaw la. O la sa. DIBIFARA bē i ko sanu maaw bolo i n'a fō a y'a jira cogo min na. Bamako komini 3nan ka nonabilā fana y'o hakilina klen de walawala a ka kuma kōnō. Kuma dilen Yusufu Jalo ma n'ale de ye DIBIFARA pēmaaba ye, ale ka foli kōfē k'a nēsin jama ma, a da sera kunnafoniseben in hakilina nacogo ma fo ka na se a tōgō dali ma. O tōgōdali kera jama felapini do senfē. O kō, a da sera dakunw ma minnu bē walawala DIBIFARA kōnō n'u b'a jini ka hadamadenya sabatili kuntaala jan senkōrōdon jamana kōnō. O dakun kelcnw b'a jini tun ka kunnafoji jōnjōnw lase jamanadenw ma walasa u ka dō fara u ka faamuya n'u ka dōnniw kan fēn caman na. Nka o baara te nēsorō fo jekabaara ni nōgōndēmē. A ye wele bila bē lajelen ma o sira kan. Jama sahalen lawasalen de tun bē kēnē in kan.

Nin waalan in dira Arasini Sali ma k'a d'a ka cēsiri kan kewale kofolen ninnu kan. Nin y'a sijē fōlō ye nin waalan ka di Afiriki den dō ma. An karamogo Arasini Sali y'a jira an na, ko nin waalan in ma di ale ma. A dira Maliden bē lajelen de ma wa bē ka kunnawolo don.

Ala k'a kunkōrōta di an ni Arasini Sali bē ma.

Mamadu KONE

Yiriwa baaraw bε cogo di Kidali mara la ?

DIBIFARA ye kene sigi k'a j̄esin Mali kōrōnfela maraw kibaruyaw ma. O dabokun ye kunnafoniw ninini y'u ka yiriwa baaraw kan ani k'u lase jamanaden bεε ma. O kunnafonijini bε bila hadamadenya yiriwali kuntaalan jan minen kōnɔ Mali jamana kan. Nin boko bε Kidali marayɔrɔ kan. O sira kan, an sera ATTAHER ma. An n'a kumana.

Yiriwa baaraw bε senna Kidali mara kōnɔ nka degun caman bε yen minnu ye gεleya don o baaraw la. Kidali ye Mali jaman marayɔrɔ 8nan ye min b'a kōrōnyanfan n'a kajakayanfan. Kidali mara ni Alizeri ni Nizeri jamanaw bε dance bɔ. Gawo ni Tumutu maraw b'a woroduguyanfan. Maa hake min bε Kidali mara kōnɔ, o bε t'i jo maa 100000 la. Olu tila tilalen don komini 11 ni nɔgɔn cε. Kidali ni Bamako cε ye kilometere 1700 ye. Ani Gawo ta ye 418 ye (tilekelentaama). Tumutu n'a cε ye kilometere 600 hake ye. Samiyεji min bε bin Kidali mara kōnɔ san kurukara, o ye milimetere 150 dɔrɔn de ye.

Ni ninnu mafilεla, a bε ye k'a fɔ ko Kidali mara gεleyaw ka ca. A fɔlɔ y'a sigiyɔrɔko ye, bawo o bennēn don saharakungo ma. Fjnekolonci ni fugakenεbaw ka ca. Fen min ye jiko ye, baj i temesira tε yen kuma tε kɔji ni jisigiyɔrɔbaw ma. Ji min bε na samiyε waati, o fana tε lasɔrɔ jama bolo fo pɔnpekɔlon n'u nɔgɔnnaw. Olu caman de kera sababu ye ka dɔ bɔ jikogelεya la Kidali mara kōnɔ.

Kidali mara lasɔrɔ man di sira fe sango samiyε waati.

Nka, an b'a ye k'a fɔ, ko

caman bora gεleyaw la k'a sababu ke jamana kunnasigw ka fεεtε tigelenw ye ka j̄esin yiriwa sabatili ma Kidali mara kōnɔ. O siratigε la, pɔnpekɔlon caman senna mara j̄εfε walasa ka jikogelεya kεlε. O kera sababu ye nakɔbaara ka j̄esɔrɔ Kidali kōnɔ. Tamaroforoko fana bε ka yiriwa jisigiyɔrɔw la Kidali mara kōnɔ. Fεεtε wεrew tigera walasa baganmara (n'o ye mara ka sɔrɔdaba ye), o ka jiidi ka taa a fe. O fεεtε bε tali ke jaame, sagaw ni baw marali kan.

Sɔrɔ yiriwali baara wεrew fana bε senna kidali kōnɔ ka j̄esin musow ni denmisew ma.

Nin fεεtε bεε bε bila sɔrɔ yiriwalu kuntaala jan minen kōnɔ kidalikaw ye walasa u ka se u yεre kɔrɔ.

Kunnafinidi nasira la, Kidali lasɔrɔli ka nɔgɔn bi kɔsεbε negejurusira fe. O ye yɔrɔnikelenko ye. Pankurunjiginyɔrɔdilan fεεtε bε ka j̄ini kidali mara ye walasa a bε lasɔrɔdiya maaw fe. Sirabadilan baaraw fana bε senna kidali mara ni Gawo cε. Kidalikaw yεre wulilen don k'u jɔyɔrɔ fa nin fεεtε ninnu waleyali kopuman na mara kōnɔ. Mara cεmaboli min bε senna, o ye kidalikaw ladusu a baaraw la, bawo Kidali mara

komini kelen kelen kōnɔ. Jama y'a faamu ko ale de ye kotigi ye. O cogo la, u ye labenw ke kominiw baarabolo kunda.

Kidali mara ka nafolo ladonta jamana sɔrɔ la, o fanga man bon kɔsεbε hali n'a y'a sɔrɔ kidalikaw bε lεnpo ni takisiw sara a jε bεε ma.

Maraw ka bolodijɔgɔnma sira kan, kidali ni Gawo ni Tumutu bolo bε nɔgɔn bolo kabini lawale la. Jago y'o sira dɔ ye sango Kidali ni Gawo cε.

Kidalikaw ni Mali mara wεrew ni nɔgɔn cε, hadamadenya siraw sabatilen don kɔsεbε, sango min ye furuko sira ye. O de la, i b'a ye k'a fɔ ko kidalikamuso furulen don Kayika, Seguka, Sikasoka, Kulukɔrɔka walima Mootikace fe. O cogo kelen na, kayikamuso, segukamuso, sikasokamuso walima kulukɔrɔkamuso fana bε sigi kidalikace kun furu la.

Nin bεε b'a jira k'a fɔ ko Mali ka kelenya min bε fɔ, nɔgɔ t'ɔ la jamanadenw yεre bolo. An bε waati min na i ko bi, yεlεmaba bε ka don Kidali mara sigibagaw ka jεnεmaya la k'a da u yεre ka cεsiri kan. Cakεdaw bε yen (AVFP, Aide Medicale Internationale, Action Contre la Faim, PSARK Coopération Norvègienne), k'u dεmε o baaraw la. O ye hεre ye jamana ma.

Yusufu JALO

"Lenposarabaliya ye degunba ye kominiw kan"

DIBIFARA : An balimake Usmani Tangara, e sigira k'i ke Bila komini méri ye. Də fə an ye Bila komini kan.

Usmani Tangara : N be fələ ka Bila kominikənomogow bee lajelen fo, olu minnu ye danaya da ne Usmani kan, ka ne ke méri nəmaa ye. Bila ye Segu mara komini də ye min be Bila serekili fe (komini 17 de b'o kono). Bila komini ni komini minnu be dance bə, olu file : Tuna (kajakayanfan), Kemeni ni Duguwo (koronyanfan), Bengene ni Mpəsoba (woroduguyanfan), jala (tilebinyanfan). Bila komini dugu hake ye dugu 20 ye. Bila komini maa hake ye maa 33265 ye. Siya minnu be Bila komini kono sigila, olu ye Bobəw, Bamananw, Fulaw, Miyankaw, Marakaw, Dogosow ni Səmonow ye.


DIBIFARA : Bila kominikənomogow ka mangan ye jumen ye soro sira fe ?

Usmani Tangara : Bila kominikənomogow se bə be cike ma. O jəda ka bon Bila soro la kosebe. An sinsinnen don senefen minnu kan, olu ye koori, malo ani no ye. Fen min ye koorisene ye, an ni CMDT bolo be njogon bolo o la. Malosene sira fe, an ni "Projet Moyen Bani tege be njogon tege. O bee kofo, senefen werew be cike Bila kominikənomogow fe sango nakosenefenw. Jədaba be musow la o baaraw la. Bila komini ye sirabadalakomini belebele ye. O koson, a dəgo (alamisa o alamisa) be nafaba lase komini ma. Yiriwali baara werew be yen minnu be ka sabati Bila komini kono n'an baarajəgɔn w ka deme ye i n'a fə "World Vision". O baarada in ka kewale pumanw dogolen te maa si la Bila komini kono. "World Vision" cesirilen don kalansojo, kenyasojo ani yiriwabaarakalan na Bila komini kono. Nin baarada kofolen ninnu bee b'u son Bila komini ka jətaa la ka fara kominikənomogow yere ka cesiri kan.

DIBIFARA : An karamogo Tangara, komini labaariali te ko nəgɔn ye. Aw ye geleya jumenw soro o la ?

Usmani Tangara : Baara o baara, a n'a geleya don a damine na, sango fen min ye kominiko ye. Tijé don kominiw sigira senkan ka jə. An y'a

fə an sigituma meri kunna, ko nin ye ko kura de ye, geleya caman bena soro min kono. An be binkawuli caman ke. O hukumu kono, an be se k'a fə k'an ye geleyaw təgo dən an be don min na i ko bi. Komini labaaranacogo sira la, an ye kalan dəw ke minnu y'a to, an ye boda soro. Min ye komini labaaranafoloko ye, Goferenaman y'an bolomadəmə fələ. O de kera sababu ye, an ka se ka baara kumfələw ke. Bila



Bila komini Méri
Usmani Tangara

foniserew fana y'u ka ənaniyapumanya da kene kan ni baarakeminənw dili ye. An kelen ka sira soro, an y'a kələsi, ko geleya caman b'an ka baara la jama fan fe. Mara cəmabəli ma faamu Bila kono ka jə halibi. Dəw miiri la, yəremabilaya dan don. O hakilina ye geleya don lenposara la, o min ye fasoden josariya fələ ye komini kono. O be cogo min, takisiko fana be ten. Mali jamana komini si te yiriwa kominidenw yere ka cesiri kə. O cesiri fələ ye lenpo ni takisi sarali ye. Ni jama m'o bə a sira fe, komini be yiriwa cogo di ? A jate mine. Min ye ninan lenpo mume sarata ye Bila komini kono, o be ben sefawari miliyon 26 ma. Nka, ne sera ka min soro, o ye sefawari miliyon 6 dərən de ye. O te degunba ye wa ?

DIBIFARA : Aw ni Goferenaman ka lasigiden jera ka fura jumen jini lenposarabaliya la ?

Usmani Tangara : Goferenaman ka lasigiden min be Bila komini kono, an n'a be baara la njogon fe wa geleya t'an ni njogon ce. An be don min na i ko bi, lasigiden y'an to an yere ma fələ. O dabəkun ye, an ye kalan minnu ke, an ka se k'o dənniya sərəlenw labaara. I k'a don k'a fə k'an ka ci ka gelən. Mun y'a geleya ? Faamubaliya. O kama, an

ka kan k'an sinsin lafaamuyali kan kosebe n'an b'a fe baaraw ka jə an bolo. Kunnafonidi kana kətige. O de y'a fura ye. O ka fisa ka garadi bila maaw la lenpo sarali la. O farati ka bon wa o t'an ka lapini ye. Ni jama lafaamuna a nəma, baaraw be sira soro. DIBIFARA jəda belebelc b'o la.

DIBIFARA : Mara cəmabəli basigili sira fe, Goferenaman be nafoloko deme ke san o san ka jəsin Marayoro Jamajekuluw ma, kərenkerennenya la kominiw. Jinan ta kasabi be t'i jo sefawari miliyari 1 ani miliyon 350 la. Bila Komini niyərə kera joli y'o la ? O nafolo be labaara cogo di aw bolo ?

Usmani Tangara : Bila komini ta benna sefawari miliyon 5 de ma ka bo Goferenaman yoro. Komi fan fila don, "ANICT" fana ta tilalen. Bila komini ye sefawari miliyon 22 soro o la. Fen min ye Goferenaman ka dilen ye, an ye baaraw ke n'o ye k'a to ke ka méri sekereteri zeneralni əreziseriwa ka sarako nənabo. An b'a fe ka wari in labara nin cogo la.

DIBIFARA : An karamogo Usmani Tangara, i be mun ke ka kuma kunce ?

Usmani Tangara : N ka foli be Bila kominiden bee ye. N ka foli be Bila serekili komini kelen kelen kənomogó bee ye. CMDT, Projet Moyen Bani, World Vision an'a təw, ne b'u bee fo ka fara Bila komini kenyereye baarada bee kan. N be weelekan jəsin Bila kominikənomogó bee ma, an k'an cesiri, k'an timinandiya komini joli fe fasodennumanya hukumu kono. Komini ka yiriwa be sabati o sira kelen dərən de kan. Fura be geleya bee la. Sira ka jan, an kana salaya bawo maa were təna an ka komini ladilan an yere kə. Ne be Bila komini jagokela n'a dəgojolaw bee fo.

Ne be foli laban lase DIBIFARA baarakela bee ma. Tijé na, aw ka nin hakilina y'an lawasa kosebe Bila komini kono. Lafaamuyali joyoro, DIBIFARA be k'o fa yere de haali. An ka dugawu b'aw ye. Aw ye do fara cesiri kan, k'an bo dibi la yere de. N'o kera, do be bo geleyaw la.

Bubakari KANTE

Dibifara ka ciden Bila

Hadamadenya yiriwali kuntaala jan

Josariyaw ko di ? An ye nin bɔ "APDF"ka sebenw na

MUSOW KA JOSARIYAW TIIMENISEBEN KONKOW

Sariyasen 14 : 1 - Jamana minnu sen be benkan in na, olu b'u janto togodalamusow kunko kerenkerennenw n'u joyoro barikamaw la ka jesin u ka duw n'u ka dugu n'u ka baaraw yiriwali ma kasoro a ma ke ni nafolosorsirakow ye. O la, jamana ninnu bee be feerew tige minnu be benkan in waleyali nafaw lase u ma u sigiyororow la.

1- Jamana minnu sen be benkan in na, olu be feere jumanw tige ka fisamanciya kele min jesinnen be cikebugu musow lagosili ma, k'u ni cew damakeje sigida yiriwali n'a nafaw la, n'o b'a to :

a) - u sen be don sigida yiriwali baaraw bolodali n'u walcyali la ;
b) - u be se ka furakeliyօrow lasօro nogoya la ani ka kunnafoniw ni laadilikanw sօro keneya ni bange kօlosili kan ;

c) - u be se ka lakanani baaraw nafaw sօro hadamadenya hukumu kօno ;

d) - u be se ka kalan suguya bee sօro nogoya la, k'a ta lakolikalan na ka taa a bila balikukalan ha ani baarakalan walasa do be fara u ka donniya kan bololabaara siratigew la ;

e) - u ka se ka nogondemetonw sigi senkan walasa u ni cew ka damakeje garise gekow lasօro ani kenyereyew baara hukumu kօno ;
f) - u sen be don sigida kunkankow bee la ;

g) - sene hukumu kօno, u ka se ka juru sօro, ka deme sannifeere siratigew la, ka baarakeminan kuraw lase u ma ani fana u ni cew bee ka damakeje forow diyօrow la ;
h) - u ka se lafiya sօro siyօrօko, duko sanuyako, ji ni yeelenko, bolimafenko ni kibaruyako la.

Sariyasen 15 : 1 - Jamana minnu sen be benkan in na, olu be jennen be n'a ye, ko cew ni musow be dama ka kan sariyako la.

2 - Jamana minnu señ be benken in na, olu bee b'a sementiya, ko musow ka faamuyali ni cew ta ye kelen ye sariya hukumu kօno, wa k'u be se ka donniyaw waleyali. U b'a dōn muso ye fana, k'a ni ce dama ka kan baara benkansebenko la, ani sօro taabolo la sariya hukumu kօno.

3 - Jamana minnu sen be benken in

na, olu sonn'a ma, ko benkan fen o fen, n'o be tali ke muso joyoro n'a niyօro dօgoyali ma sariyako hukumu, k'o ka kan ka kele.

4 - Jamana minnu sen be benken in na, olu bee bermuso ni ce damakeje sariya la, sariya min be tali ke dugutaa kecogo kan ani sigiyօro sugandili kan.

Sariyasen 16 :

1 - Jamana minnu sen be benken in na, olu be feere jumanw tige ka muso lagosili suguya bee kele, ka jesin furukow ni du kunkankow ma, ka muso ni ce damakeje walasa :

a) - muso ka se ka don furu la a yere ma ;

b) - muso ka se k'a diyanyece sugandi, ka furu o ma kasoro a ma diyagoya ;

c) - muso ni ce joyoro ka ke kelen ye furu donwaati n'a bowaati la ;

d) - muso ni ce be damakeje bangebaaya la denw kunkanko la kasoro a ma ke n'u ka furuko jatemine ye, denw ka here de folo be jatemine ;

e) - muso ni ce be damakeje denw hake sugandili la ani bangew ce janyali bolodali la, ani fana muso ka se ka kunnafoniw ni kalan sօro minnu b'a deme ka sira ninnu taama ;

f) - muso ni ce be damakeje denw tigiya, lamcyօrօkow n'u ka kalanyօrօkow la, nka a mana ke cogo o cogo, denw ka here de be jatemine folo ;

g) - muso ni ce be damakeje denw jamu an'u ka baara keta sugandili la ;

h) - furumiso ni furuce be damakeje hakililaw dili la du sօrow baaracogo n'u ladoncogo la anijenaje keli fana na.

2 - Mamineni ni denmisew ka furukow te ke sariyako ye nka, feerew ni sariyaw be ta, walasa ka ben si hake do kan furu te se ka ke min jukօro ani fana furuseben ka ke fen wajibiyalen ye.

Sariyasen 17 :

1 - Walasa k'a fesefese ni benkan in ye netaa sօro a waleyali la, baarakiekulu do sigira senkan min jesinnen don be musow lagosili keleli ma, jekulu in ye mogo tan ni seegin (18) ye minnu sugandira dənniyatigi mogo

mugan ni saba (23) ce la n'olu ka dənni be tali ke benkan in konkow kan. O jekulu in ka baara be damine ka ben benkan in waleyali damine ma.

2- Jekulu in mogow be sugandi wote senfe jamanaw ka mogo togo kelen kelen dilenw ce la.

3- Sugandili folo be ke benkan sigilen senkan ka kalo wօcօrօ ke. Ni sugandili to iora kalo saba (3) ye, Nasiyon Zuni nemogó be bataki ci jamanaw kelen kelenna bee ma walasa u k'u ka mogo togo di. Ni togo bee ser'a ma, a b'u bee fara nogon kan seben kelen kono, k'o caya, ka do ci jamanaw bee ma walasa u ka se k'a dōn sugandili bēna ke minnu ni nogon ce.

4 - Jekulu mogow be sugandi Nasiyon Zuni nemogó ka tonsigi labennen do senfe, Nasiyon Zuni soba la. Benkan jamanaw tilalen saba ye, n'o tila fila mogo yera kene kan, wote be ke. Mogó minnu togo be jama caman sօro, olu de be ke mogo sugandilenw ye.

5 - Jekulu in mogow be sigi ka san naani de ke. Nka, mogo folo minnu sugandira, mogo kononton b'olu la minnu ka waati be fa san fila kono. Jekulu in nemogó de be mogo kononton togo sugandi a kufe tali kelen k'o.

6 - Mogó duuru minnu ka kan ka fara tow kan, olu be sugandi i n'a fo dakun 2nan, 3nan ni 4nan y'a jira cogo min sariyasen in kono, k'o masoro jamana bi saba ni duurunan donnii na benkan in na. Mogó duuru in na, mogo fila ka waati be fa san fila kono, nemogó de b'olu togo ta tow ce la a kufe.

7 - Ni sigiyօro do lankolonyara komite in na, jamana min ka mogo bora, o jamana kelen in de be yamaruya ka mogo were bila o no na.

8-Asanbile Zenerali ka yamaruya kono, jekulu in mogow be sara hake do sօro, min wari be bo Nasiyon Zuni ka sօrow la.

9- Nasiyon Zuni nemogó be deme don jekulu in ma ni mogo ni baarakeminan ye walasa a ka se k'a ka baara ke kojuman ka ben benkan in hakilina ma. (To ne 8)

Fakannakalanko : Netaa ka sabati

Fakannakalan lajeba fōc sigira Bamako lajekesoba la k'a ta okutoburukalo temenen tile 29 na ka taa a bila nowanburukalo tile 1 na. Maa 300 hake de tun be lajeba in kene kan. Senegalikaw, Burukinakaw, kōnōwarikaw ka fara Malidenw ni jamana demejekuluw ka cidenw kan Lajeba in sigira k'a ke hakilijakabō ni njogonnamen kene ye walasa ka baaranjōgon sira jelenw bō ka fakannakalan jiidi Mali kōnō. Lanini ye netaa ka sabati.

Fakannakalan be nēfō cogo di ? Degeli ni kalanni siraw don Iadamu hukumu kōnō ka dōnniyaw latēmē maaw ma sigidaw la. O be latēmē maaw ma (denmisēn ni balikuw) minnu ma garisēgē lakolikalan na walima minnu ka lakolikalan danna sira la. A kalan sinsinbere ye fakanw ye. Balikukalansow ni yiriwakalansow, nin bēs be jate fakannakalansow ye.

An ka hakilijigin ke. Mali ka yērēta temenen san filan (san 1962), jamana kunnasigiw y'a mafile ka yēlēmaba don Iadamu na kalanko sira fe. Nka, o fērē ma sira soro bawo a kera faransikan na. Teheran lajeba sigilen san 1965 waati, a ninina dijnē jamana bēs fe u k'u wasa don

fakanw na kalan sira fe Iadamu hukumu kōnō. O fērē ye sira soro jamana caman bolo sango Mali jamana. O misaliw yera jamana cakēda caman ka baaraw taabolo numan sabatili la i n'a fō ODIPAC, CMDT, Segu Ofisi n'u njogonnaw. Olu n'u baarakēnjōgon togodalamaaw nana jamana soro yiriwa. Togodalamaaw ye dōnniya ni fērēw soro minnu kera sababu ye, u yērē ka se ka baara caman nēbō u yērē ye kasoro u ma den baarada si la. O sira kan, sannifeere, jurukannisiraw, kene ya sabati walew, sanjsuma, ninnu bēs nēdōnna togodalamaaw fe ni wasa ye bawo soro jiidira u caman bolo jamana sigidaw la. Balikukalan y'o sababu ye. Fakannakalan y'o sababu ye. Yiriwakalanko nana sigi sen kan a ka ca san 5 ye (o tutigēbaga kera Plan International ye). O fana kera a damansira ye sango denmisēn kunda(minnu ma garisēgē lakolikalan na walima minnu ka lakolikalan danna sira la). Baaranjēdōn fērē min be ke k'o kalan kuncē, o kera sababu numan ye jamana sigida caman bolo ka kunfinya ni desēbagatōya kelē. Fakanw jōdaba b'o kalan n'o baaranjēdōn fērēw la. N'i y'a jatemine san 1965 la ka na se bi ma, i b'a kōlōsi k'a fō ko jamaden minnu ye fērē ni dōnniyaw soro fakan sira fe k'u ka nēnamaya sabati, o ka

ca ni maa miliyon 1 ye. N'an seginna lajeba in ma sa, an b'a ye k'a fō ko gēleya kunba fila de nana n'a sigili ye : kunfinya ni desēbagatōya kelēli. O de y'a to, lajeba in kuncētuma, lajiniw na, kologirin fila y'an hakili minē. A fōc, yanni san 2008 ce, kēmē sarada la maa 50 hake ka sāma ka bō kunfinya la. A filan, baarada min yērē ye lajeba in labēnbaga n'a kotigi ye n'o ye CNR-ENF ye (ale ye baarada kura sigilen ye ka nēsin fērē kura tigeli ma ka nin Iadamu bolofara kologirinya jamana kōnō), o baarada ka k'a dama cakēda ye walasa a ka se k'a ka ciya dantigēlen sira bō a nēma kasoro a ma den baarada wēre la. O siraw bōli de b'a to hakilina waleyali be nōgoya wa CNR-ENF bēna s'o de la ka nōba bō, nētaa ka sabati.

Lajeba in nēmaaya tun be kalanko minisiri bolo n'o ye Musitafa Dikc ye. A musaka bōbagaw tun ye ninnu ye : PRODEC, UNESCO, Foundation Paul Guérin Lajoie, ADS, World Vision, Plan International.

Lajeba in kera njogonnamen ni jekabaara hukumu kōnō maaw ni njogon ce. Ala ka baaraw nēbō kojuman sabati CNR-ENF n'a baarakēnjōgonw bolo kunfinya ni desēbagatōya ka kelē ka bō jamana kōnō.

Yusufu JALO

Boko 3 San 2001 Nowanburukalo

Dunkafa Togoladon Kerenkerennen

Bagineda kera misali ye

Okutoburukalo tile 16 temenen, dijne seleke naani ye dunkafa togoladon kerenkerennen janaje ke.

Jinan ta kera Bagineda (Kulukoro mara la). Jamana 150 de jera ka dunkafa togoladon kerenkerennen in seli noggon fe.

An be don min na i ko bi, maa miliyon 800 de ye desebaato ye. O de kama, a kanuna dijne seleke naani ka jinan ta sigi "Kongo keleli hakilina kan, walasa do ka bo faantanya la". Bawo, kongoto te se ka senet ke ko ka bo noggila. O de y'a to, dijne seleke naani maaw y'a kanu ka jama lafaamuya halibi kongoko kan ani ka noggondeme sinsin walasa hadamaden bee kelen kelenka se ka dunkafa soro don bee. O siratige la, faantanya be se ka kelle ka bo dijne kono dcooni-dcooni.

Walasa wale in ka se ka tiime, Goferenemanw, Kenyereye baaradaw ni dijne seleke naani baaradaw ka kan k'u fanga fara noggon kan min b'a to nin hakilina in be se ka sabati. Mali Jamana fana ye feere tige ka nesin faantaya keleli ma.

Okutoburukalo tile 16, san 2001, nege kanja 10 waati, Bagineda Komini nema Mahamadu Tarawele ye jama bisimila ni nisondiyaba ye.

An ka Togoda Yiriwali Minisiriso nema, Mahamedi El Madani Jalo tun be jama ne ka fara kenyereye baarada caman ka cidenw kan nin kene in kan. Kerenkerennenya la "FAO" togola, Aginalido

Lisibowari tun be kene kan.

Dantige saba kera.

Bagineda Mori Mahamadu



Dunkafa ka sabati (CTA ka ja)

Tarawele y'a ka nisondiya jira ce ni muso bee lajelen na Bagineda sungandili la Goferenaman fe dunkafa togoladon kerenkerennen janaje kama. Ay'a jini Jamana Kunnasigiw fe, u k'u ka politiki baaraw nesin togodaw ma, k'a d'u ka desebagatow n'u ka balodesebagatow caya-kan.

Ale boen yen, "FAO" ka ciden ye kuma ta n'o ye Aginalido Lisibowari ye. A ye Mahamedi El Madani Jalo fo dunkafa togoladon kerenkerennen 21nan keli la Bagineda Komini kono, komini min ye senekoyoro lakkodonnenba ye.

A ko fana ko Goferenaman y'a naniya jira noggondeme ni bolokofemaaya keleli kalo baaraw kono. Ko be ke deme ye ka nesin Nizeri babolofe maaw ma n'olu ye senekelaw, baganmaralaw ni monnikelaw ye. Kerenkerennenya la, wame ye minnu ka forow n'u ka sow bee halaki. Olu ye Selengkaw, Bamakokaw ani Baginedakaw ye. "FAO" ka ciden ka kuma la, o b'a jira ko Goferenaman ka

klosi b'a ka jama kan, deme siratige la.

An ka togoda Minisiriso nema labanna ka kuma ta. El Madani Jalo ka dantige kono, a ye hakilijigin ke dunkafa togoladon kerenkerennen sigili la sen kan.

A ko : "dunkafa togoladon kerenkerennen sigira sen kan, aw b'a don ka koro, o kera "FAO" ka lajeba filanan senfe Ororu, nowanburukalo, san 1979. Walasa ka "FAO" ka sigili sen kan sanyelema janaje ke"

Dantigew bannen, jama bilala Minisiri El Madani Jalo ko ka taa bololabaarakelaw ni feere ni dognitigilamaaw ka feerekoyoro labennenw laje. O kofe, jama sorola k'a kun da OPIB ka maloseneoyorow kan. O kun tun ye de Minisiri n'a nofemaaw ka se ka klosili ke kalandenw ka baara kelenw na malosene cogo kan. O ye k'a ta malo turucogo la fo ka taa se senefen juguw kelcogo ma.

An b'aw ladonniya k'a fo ko Minisiri nisondiyara kosebe kalandenw ka baara kelenw na. U ka baaraw ye danfaraba don malo klosilen n'a klosi bali ce.

Sani baaraw ka kunce, Minisiri ye kalanso kura were kurubonkari ke OPIB lajebulon kono Bagineda.

Baaraw bee bannen, jama koseginna Bamako ka kene ni nege kanja 4 waati ye.

Aw k'an ben boko nata.

**Bubakar KANTE
DIBIFARA ka Ciden Bagineda**

Hadamadenya yiriwali kuntaala jan

Musoya te mōne ye

(n̄e 5 to)

MUSOW KA JOSARIYAW TIIMENISEBEN KONKOW (*tɔ n'a laban*)

Sariyaset 18 :

- 1 - Jamana minnu sen be benkan in na, olu be lahidu ta, ka seben ci Nasiyon Zuni n̄emogo ma, jekulu sariyako, kiriko, baarakecogo ani cogoya were minnu be tali ke benkan in taacogo numan sankorotali feerew kan :
 - a) - san kono, jamana masina ka benkan waleyali kan ;
 - b) - san naani o san naani kolosiliw, jekulu ka jinini kono ;
- 2 - Sebenw kono be se k'a jira geleya minnu b'a bali ka benkan in konkokow tiime.

Sariyaset 19 :

- 1 Baarakejekulu in b'a yere ka baara taabolo sariyaw sigi.
- 2 Jekulu in be n̄emogow sigi a yere la, n'olu be n̄emogoya ke san fila kono.

Sariyaset 20 :

- 1 - Baarakejekulu in mogow be nogon ye dögökun kelen kono san o san walasa ka sebencilenw fesefese i n'a fo sariyaset tan ni seeginnan (18nan) y'a jira cogo min.
- 2 - Baarakejekulu in ka tönsigow be ke Nasiyon Zuni ka soba kono walima yoro la, ben mana ke min kan.

Sariyaset 21 :

- 1- San o san, baarakejekulu in be jefoli ke Nasiyon Zuni Asanbile Zenerali ye a ka baara kelenw kan, soro ni hadamadenya bolofara sira fe, k'a hakilina fo ani ka jinini ke k'a da jamanaw ka seben cilenw konkokow kan.
- 2 - Baarakejekulu in n̄emogo be jekulu ka baara kelenw seben ci musow kunkanko jekulu ma, k'a ladonniya.

Sariyaset 22 :

- Baaraada kerenkerennenw yamaruyalen don u ka ye benkan in sariyaw sigiyoro la, sariya minnu be tali ke u ka baaraw taabolo kan. Baarakejekulu be se k'a jini u fe, u k'u hakilina fo benkan in sariya dow waleyali kan waleyali minnu faamuya tigi y'u ye.

Sariyaset 23 :

- Benkan in saruya si te fijne don ce ni muso ka kelenya netaa cogo numanw na :
 - a) ka jesin jamanaw ka sariya talenw ma,
 - b) walima ka jesin benkan werew ni sarati talen werew, fo ka t'a se dije bee je benkanw ma, minnu be waleyali jamana ninnu kono.

Sariyaset 24 :

- Jamana minnu sen be benkan in na, olu bee be lahidu ta, ka sariyaw sigi u fe yen walasa josariya minnu be benkan in kono, olu ka lakana k'u waleyali.

Sariyaset 25 :

- 1- Benkan in dayelelen don jamana bee ye, minnu b'a fe k'u bolono bila ala.
- 2 - Nasiyon Zuni n̄emogo ye benkan in sebenw marabaga ye.
- 3- Benkan in be se k'a sementiya, wa a sementiyakunw bee be mara Nasiyon Zuni bolokoro.
- 4 - Nin benkan sendonni labilalen be jamana bee ye. Donni be sementiya ni secreya do bilali ye Nasiyon Zuni n̄emogo bolokoro.

Sariyaset 26 :

- 1-Jamana kelen o kelen be se k'a nini waati bee, seginkanni ka ke benkan in konkokow kan ni seben cili ye Nasiyon Zuni n̄emogo ma.
- 2 - Ni seben cilen in konkokow ye lakika ye, Nasiyon Zuni tönsigiba de be se ka seginkanni in yamaruya.

Sariyaset 27 :

- 1 - Benkan in waleyali be damine a sementiyasaben walima a sendonniseben mugannan la tile bi sabanan, Nasiyon Zuni Sekereterei Zenerali ma.
- 2 - Jamana o jamana ka sementiyasaben walima sendonniseben mana na sementiyasaben walima sendonniseben mugannan in ko, waleyali damine be ke ka ben o jamana ka sebenw laseli tile bi sabanan na.

Sariyaset 28 :

- 1 - Hakilinatasaben ni sementiyasaben, olu be ci Nasiyon Zuni n̄emogo ma ; ale fana b'olu ci jamana kelen kelen ma.

- 2 - Hakilinata fen o fen ni benkan in te taa sira kelen fe, o te sira soro.

- 3 - Hakilinatasaben ninnu be se ka soro ni jininibataki cili ye Nasiyon Zuni n̄emogo ma, ale fana be jamana tow kunnafoni.

Jininibatakiw jatemineni be ke u sendonni de la Nasiyon Zuni n̄emogo fe.

Sariyaset 29 :

- 1 - Faamuyabaliya fen o fen mana don jamana fila walima caman ni nogon ce k'a da benkan in faamuyali walima a waleyali kan, ni sigikaf m'o ne, o da be jira dije kiiritigebulonba la k'a ben o sariyaw ma.

- 2 - Jamana fen o fen sen be benkan in na, o kelen kelen be se, a bolonobila waati seben in na, k'a jira, k'a sen te nin sariyaset 29nan josen folo la. O la, jamana sendonnen tow n'o jamana masina te nogon soro josen folo in hukumu kono.

- 3 - Jamana fen o fen mana hakilinatasaben ke tigeda 29nan in josen filanan kan, o jamana be se waati min mana a diya, k'a jini Nasiyon Zuni n̄emogo fe, a ka k'a hakilinatasaben in bo a ma.

Sariyaset 30 :

- Nin benkan in, n'a konkokow sebenni be Angilekan, Larabukan, Sinuwakan, Esipanjolikan, Tubabukan ani Irisikan na, olu be bila Nasiyon Zuni n̄emogo bolokoro. K'a da u qanayaw kan, jamana sendonnenw y'u bolono bila benkansebenw kono.

An ye nin kunnafoniw bo
"APDF" ka sebenw na

APAF-Muso Danbe : Baarakedenw Lakanada


"An k'an bolo di njogon ma ka baarakedenw lakana"

APAF-Muso Danbe, jōn t'o dōn Mali jamana kōnō ? Kēnyērēye ciyakēda don min nesinnen don musow ka nētaa sabatili ma sango an balima npogotigi minnu bē bo Mali dugu misēnw kōnō k'u kunda dugubaw kan k'a sabu ke baaraninini ye. DIBIFARA wulila ka se APAF-Muso Danbe baarada la. An y'a nēmaaba kumajogonya n'o y'an balimamuso Madamu Iriben Danbele ye ni daw ko "Mama". Cesiri dan y'an balimamuso in ta ye.

DIBIFARA : Madamu Iriben Danbele, e ye AFAP-Muso Danbe nēmaaba ye. AFAP-Muso Danbe sigira sen kan waati jumēn ? A sigikun kera mun ye ?

Madamu Iriben : N ka foli b'aw ka kunnafonilase sēben ye n'o ie DIBIFARA ye. DIDIFARA kōrō ye mun ye ? O kōrō ye ka dibi bōcōw nēma. Aw ni anw, an bēe hakilina ye kelen ye. Ne bē baara la maa minnu kōson, dibi belebele de bē u nēnan. A b'u nēnan bi a b'u nēnan sinin. AFAP-Muso Danbe baarada ni denmisēnw tōgōla, ne ka foli bē DIBIFARA ye.

AFAP-Muso Danbe sigira sen kan kabini san 1991. O san 10 ye ninan ye. Mun ye anw bila ka nin baarada in sigi ? Hadamadenya tōpotoli baarada n'o ye "Service sociale" ye, ne y'o cakēla ye kabini san 1963 waati. An ka baara bē nēsin maa minnu ma, olu ye maaw ye, se te minnu ye, cogoya te minnu bolo, dibi bē minnu nēna. O siratige la, ne yēre ka baara fōlōla niwakiniji la Modibo tile waati. Mōgōw tun bē forow ke sow kōnō, o kēra sababu ye ka sosoko bonya. Denmisēnsaya cayara. Maaw tun b'a fō ko kōnō ye den mine k'a sōrō sumaya kōgō kojugu don. Kōnō te bo kungo la ka ma den si mine. O bōlen kō yen ne ye n gēre



APAF nēmaaba
Madamu Iriben Danbele

fiyentōw la k'a d'u ka dēsē kan. O fana kēra san 19963. O waati, fiyento bēe tun bē dugukōnōna bila ka t'u sigi Badalabugu (o ye Bamako kin dō ye). Ne y'a faamu ko fiyento den bē tile ban bangebaga nēminēni na. Denmisēn tē kalasolataa sōrō, a bē ke sababu ye ka fīnē bila a ka janamaya la. Ne dun ncinin na ma togoda la, n ye fiyentōw ye u bē baara ke. Ne ko mun na dugubakōnōna taw fana tē baara ke. Ne taara n hakilina jira n ka nēmōgōw la. Olu ye ne ladusu a baara fē. UMAV ni IJA sigira senkan o cogo la O kō, baloko tōnko n'ç ye "coopérative de consommation" ye, o ko nana sigi senkan. Ne ye wulikajo k'ola. O fana kōfē, n ye lujuratōw makari mine. N ye n jija k'olu fana dēmē n seko la.

Olu ka tōrī yēre tilala ka n wele ka baarabolofara dayēlē ka nēsinkalanko ni baarakēda ma k'o nēmaaya kalifa ne na. N ye nō bila o tōn na cogo min, n y'o kelen de ke poroze cāman na i n'a fō "Chaine de l'Espoir" n'u nēgōnnaw.

Nin bēe de kōfē, n ye n balimamusow hīnē minē kērenkērennenya la baarakedenw. Degun min b'u kan u ka dugubakōnōbaara la, o dogolen tē maa si la. N'u wulila kabini fajiri kanjē folō, u bē minēnōgōw ko, u bē ji ta, u bē fini ko, u bē tobili ke, u bē ka fara denmine kan. Nin bēe kōfē, u jatigiw b'u bila jago misēnninw na wa u ka sara bē b'o de la. N'o jago ma nē, u ka sara tē sōrō. Jatigiw b'u nēgē ka fini kōrō ni samārā kōrōw d'u ma, o dun tē maa ka nēnamaya dilan. An y'a kōlōsi tun k'u bē minēkojuguya la dugubaw kōnō u jatigiw fē. Kasōrō u bē dēmē belebele de lase furumusow ma u ka cēlasigi la. Ni baarakedenw tē, furu caman tun bē sa dugubaw kōnō. An k'o fō k'o lajēya. Walasa k'o degunw wulili ka b'u kan, an ye APAF-Muso Danbe sigi senkan nin cogo in na san 1991 waati. Tjē don dō bē ja la, belebele bē ja cēlakaw yēre la. O kama, an ko denmisēnw jatigiw mē aff k'bō Boko 3 San 2001 Nowanburukalo

(n° 9 to)

"An k'an bolo di njogon ma ka baarakedenw lakana"

bolo di njogon ma ka denmisénw ladon. O sira kan, an ye APAF-Muso Danbe baarabolofara carin mali kono. Bamako ta ye ninnu ye "300 Logements", Hamudalayi, Torokorobugu, SEMA I, Falajé, Majanbugu. Maraw kono, bolofara do be Banjagara ani Mooti-Seware, Maa hake min be APAF-Muso Danbe la baara la, o ye cakela maa 30 ye (saratala y'o la 20 ye)

An fe APAF-Muso Danbe la, an be bilasiralikan caman fo baarakedenw ye. An b'u dege fén caman na : tobili, jéya walew, finiko, dennadon, hadamadenya keko juman. An b'u lasomi fana cénimusoya bana dogolenw tangacogo la. Nka o bëe n'a ta, ni min ye kono ta, ni maa ma son o la, an b'o ladon ka tila k'a soronadon den fa yoro ani baarakeden bangebagaw yoro.

DIBIFARA : APAF-Muso Danbe be baarakedenw don baara la cogo di ?

Madamu Iriben : Ni musomanninw bori' u faso la ka na duguba kono, u be jigin u jatigi bara. Ni minnu ser'an ma APAF-Muso Danbe la, an be wuli ka s'u jatigi ma ka hakilifalen ke: An b'an felaw dahir'u la. N'an benna kelen ma, an be seben kerenkérennen ke baarakesen togo la, ka kelen ke jatigi togo la. U kelen kelen ka lahalaw be k'o seben kelen kelen kono. O keli be baara nogoya an bolo. Denmisénw be soro ka don baara la. Nka yann'u ka baara damine, an b'a fu ye u ka jéya (n'u bora negeñ

na tuma o tuma, u k'u tegé ko ni safune ye), U kana sonyali ke. Ni tijené kér'u bolo, u kan'a dogo u jatigi la. U k'a fo u ye. An b'a fo u ye fana k'u ka baara miné ni sebe ye, ka jogo humanw ta. U k'an'u ta duguba diya fe. U nana danbe min kono, u ka segin u somogow ma o danbe kelen kono. An be min fo jatigiw ye, o ye u kana to denmisénw ka kongo u bolo. U k'u miné i ko u b'u yere denw miné cogo min na bawo hadamaden man fisai ni hadamaden wére ye. U kana denmisénw töoro. U k'u ka sara d'u ma yann'u woosiji ka ja.

Ni sara dira denmisénw ma, an b'u nininka a ka bila biro la wa walima a ka d'u yere ma. Ni min ko a ka d'a ma, an b'a d'a ma. Nin min ko a ka bila biro la, an b'a bila biro la. Ni baarakeden ka sara bila la an fe APAF biro la, dörôme kelen te bo a la wa n'a nana a nöfe waati o waati an b'a dafalen ta k'a d'a ma. Dörôme t'a je. Ni baaarkeden jatigi y'a ban k'a ka sara d'a ma, walima a y'a dun, an be taa a nöfe a k'a di hali n'a b'a bolofén do don a da fe.

Baarakeden minnu b'an ka bolokan, an b'u furake n'u banana, an b'u ladon, an b'u lakana. Ni min ye kono ta, n'a te se ka segin a faso la, an be mögo d'a kan ka taa a bila a bangebagaw yoro. Ni bangebaga minnu denmusow boli la ka na, n'u b'an ka bolo kan, n'u nana u nöfe, an b'u d'u ma. N'u tununen don, an be je k'u nini fo k'u ye.

DIBIFARA : N'aw ye

musomanninw don baara la, yali aw be wuli ka taa u baarakedenw laje wa an'u be minécogo min na u jatigiw fe ?

Madamu Iriben : O yere de y'an ka baara taasira lakika ye. Mognow b'an bolo APAF la, n'olu ka baara nesinnen don o ma n'olu ye animatiriswiye. Olu be na ni jaabi minnu ye o noboli baaraw la, o b'a to en b'a don ni baarakedenw be ka baara ke ka je ani fana ni jatigiw be ka baarakedenw miné k'a je.

DIBIFARA : Aw be nin baara min na, yali sara be APAF ye wa ?

Madamu Iriben : K'a fo sara te anw ye, sara be anw ye. Ala ka sara be yen. Baarakeden mana ke fén ye, o ye sara belebele ye APAF bolo. Maaw be min fo ko do be tige baarakeden ka sara la, o te ke APAF la. N b'o fo ka o lajeya bëe ma. APAF be baarakedenw ladon, k'u furake ni musaka minnu ye, u dibagaw ye an demejogonw ye : "PAREHF", "World Vision", "AEC", "UNICEF", "Fondation Cursen", "Solidarité Canada Sahel".

Ni jatigi min nana baarakeden nini APAF la, i be dörôme 300 sara. APAF sigilen don baarakedenw lakanani kama, k'u bo nögo la, k'u bo dibi la. O baaraw be ke jelenya la. Geleya juménw be APAF Muso Danbe kan a ka min baaraw la ? Aw b'o kunnafoninw soro boko nataw la.

Mamadou KONE
Yusufu JALO

Tulonniye

Maana

Batigemisi

Daramani Tarawele ye kalimu donso ye. A ye gafe caman sèben Bamanankan na. Nin y'a ka maana in latemé ko sabanan ye.

Dögökun fôl Fangabugu kôno

Labensokaw bë Fangabugu dögë masi. U'be wuli Labenso kabini araba soggoma. U'be taama kawula kunben Fangabugu ka si yen. Dugu mana ce, u be dögö jo alamisa. O wula kelen, u be Labenso sira miné. U caman tun bë segin saafo téménen ko. Nin don, Zanpege fana yera dögomasiv fe, ka taa Fangabugu. A ka cekoroba ye jatigila sugandi a ye.

Zanpege jiffinna a jiginyor, bawo a fa bonya n'a kanu tun bë Gejuma yor Fangabugu kôno. Gejuma ye Zanpege miné n'o hakili fana ye, k'a don a sogo n'a wolo ni njogon ce. Jatigila diyara Zanpege ye, bawo fosi kelen ma bananbiri Gejuma ka du kôno. Cikédugu bë no bila mögo la, i mana ke mögo fen o fen ye. Zanpege ka ko man ca, a ka ko man gelen. Mögo masumanen don, a dusu fagalen don, a b'a sigiyor dòn, a b'a kumayor dòn. O jogo numan bës ye Zanpege ni jatigiw kan ben. A y'i diya yen ka tème Labenso kan.

Dögökun fôl bë dafa tuma min, Gejuma y'a jate miné ko Zanpege dunanyaji donna sa. O kama nin don soggoma, a ko dunankenin ma :

-N'i nana duguba kôno, i b'i walawalan, k'i kun kenyaya cogo min i be doonin soro. Sisan, e hakili bë ka mun baara ke Fangabugu yan ?

Zanpege ka jaabi kéra nin ye :

- Ne ko Buwa ma n nat, ko n bë baara kalan. A sonna o ma. N'e fana ma ban, ne bë don jirisikaramögö dë fe baara kalan na.

- Ni n teri ma ban, ne bankun man kan ka ke. Alasani ye karamögö ye jirisi la, n b'a laje i ka don ale fe baara la. O bë son ka fisaya.

Zanpege ma fen da Gejuma ka kuma kan, nka Gejuma ka fôlen diyara a ye.

Nin kuma fôdon dugusaje wula fe, Gejuma taara Zapege di Alasani ma jirisi la, a k'a kalan a se la. Baara b'o la, jogo fana b'o la. A kan'a miné ni kôno fila ye. Bögökene don, a k'a hakili to a la. Minnu ye sokonjogo tòw ye, ale Gejuma n'a musow b'u jo n'o sabatiliko numan ye.

Senegali ye Kabarali togolakupu yalon Nowanburukalo tile 3 f'a tile 11, Afiriki jamana 7 ntolaciton ye njogon soro Mali la Kabarali togolakupu nôfe : Benen, Ganbi, Kapu Weri, Lajine Bisawo, Moritani, Senegali ka fara Mali kan. Nin jamana ntolacitonw nan'u disi da njogon sebaya jinini na. Ntolaciton ninnu tila tilala kulu fila ye.

Kulu fôl : Benen, Lajine Bisawo, Mali ni Moritani. Olu taara u kôgo da njogon na Segu komini ntolaci kene kura kan.

Kulu filan : Ganbi, Kapu Weri ni Senegali. Olu ka cêbo kéra Sikaso komini ntolaci kene kura kan. Yanni ntolacitonw ka wuli k'u dagayor segeré, a ko jutigera Bamako ntolaci kene "26 Mars" kene kan. Aw k'a dòn ko Kabarali togolakupu boko 17nan sebaga kéra Senegalikaw ye. Olu ye ntolaciton ninnu bëe dasi. Senegalikaw ma dan o ma bawo ntolatanna fana soro la u ka ton na n'o ye Usumani Ndoyi. Celu yaarabagañana kéra Lajine Bisawokaw ka Ferinando Maniyelo ye. Nin ntolatan njogondan senfe, celu yaarala siye 39. Fen min ye Mali ntolaciton ye, o ye joyoro 3nan ta.

Ntolaci njogondan jaabiw :

Kunfôlôw :

Mali - Moritani : 3 ni 2

Lajine Bisawo - Benen : 7 ni 2

Mali - Lajine Bisawo : 0 ni 0

Benen - Moritani : 2 ni 0

Senegali - Kapu Weri : 5 ni 1

Senegali - Ganbi : 1 ni 1

Ganbi - Kapu Weri : 1 ni 1

Sekilisabasiri boliw :

Ganbi - Mali : 1 ni 0

Senegali - Lajine Bisawo : 2 ni 0

Sabanan jeyoroko cêbo :

Mali - Lajine Bisawo : 2 ni 1

Sebaya jeyoroko cêbo :

Senegali - Ganbi : 3 ni 1

Senegalikaw kéra ntolaci in njogondan sebaga ye.

Bubakari DABO

DIBIFARA

Sebenfa ni labolikuntigi Yusufu JALO

Sébennikulu njemaa Bubakari KANTE

Demejogonw Amadu Tanba Dunbuya

Mamadu Kone, Kasimu Kone (Indiana), Bubakari Dabo

John Hutchison (Boston), Daramani Tarawele

Labugunda : AMAP/Kibar, Bamako

Sigida : Bajalan I^o, bolon 469, du 302,

@ : dibifaramali@webmalls.com

Boko hake : 3000

DIBIFARA Boko 3 San 2001 Nowanburukalo